

Winteredisie 2005  
Jaorgang 15, nr. 2  
Oplage: 1900 stoks

# 't Herenhoentien



**BESTE KIENDER!**

Et ienc mement liekt et nog wel zommer, en dan staot iniens de kastvekaansie al weer zowat veur de deure. Et leck d'r haost op dawwe mit de kastdaegen en oold en ni'j buten zitten konnen. Meugen jim allemaole et ooldejaor uutzitten, of hebben jim dat nog niet an jim thuis vraogd? Piepmoes en zien kammeraoden gaon et ooldejaor in elk geval wél uutzitten, en nog butendeure ok. Mar zi'j hebben dan ok allegere een lekkere waarme vacht of een dik pak veren! Ze bin van plan en maek d'r een bar gezellige aovend van. As ze now mar gien hinder van de katten Klaos en Miep krieggen... Mar et zol oons niet verbaozen, jim dan? Jim moe'n mar gauw et verhael op de volgende blad-zieden lezen, of juf of meester vraogen as die et veurlezen willen!



Op de achterkaante van et kraantien staon een peer spullegies. Op et inlegvel staon vier kastlieties in et Stellingwarfs. Twieje daarvan kennen jim wel, de ere twie kuj'm op twie bestaonde wiesies zingen!

't Herenhoentien is veural bedoeld veur groep 1, 2, 3 en 4 van et basisonderwies in de Stellingwarven en verschieit vier keer in et jaor. Et wodt bedocht, saemensteld en klaormaekt deur Gery Scholten en Sietske Bloemhoff van de Stichting Stellingwarver Schrieversronte in Berkoop (till 0516-451108)

## **PIEPMOES ZIT ET OOLDEJAOR UUT**

*(Een veurleesverhael van Sietske Bloemhoff)*

Een weke naodat Sunderklaos weeromme gaon is naor Spanje, kommen de dieren uut de bos van Piepmoes bi'j mekeer. Et is douk zo weer kasttied en dan moet de denneboom prachtig versierd wezen. Die denneboom staot op et eupen plak in de bos van Piepmoes. Alle jaoren versieren Piepmoes en zien kammeraoden de boom zo mooi meugelik. Ze vieren et kastfeest ommes altied mit mekeer, weten jim nog wel? Ok veur van 't jaor maeken de dieren weer alderhaande ni'je spullegies om in de boom te hangen. Ieder jaor etzelde is niks an, vienen ze.

'Weej' wat we van 't jaor ok wel docn kunnen,' vragt de gelegouw an de eren. 'We kun in et plak van de steern wel es wat eers op de toppe van de boom zetten. Die steern bruken we al jaoren.'

'Dat liekt mi'j wel een goed idee,' antwoordt et roodbossien. 'We kun vanzels de steern wel beweren, dan kun we die laeter nog es weer bruken.'

'Dat is ok zo,' vint de doeve, 'mar wat wol ie dan dit keer?'

'Ja, en dát weet ik now aenlik niet,' schuddekoft de gelegouw een betien sneu.

'Mar ikke wel,' zegt Piepmoes inienend, 'ik weet wél wat. As we now es mit hiele mooie grote en glimmende ciefers et jaortal 2006 boven op de boom zetten? We laoten de versiering ja altied tot nao ni'jjaorsdag zitten. En weten jim wat ik now ok bedaenk,' gaot et moesien in ien aosem veerder, 'we kun et ooldejaor ok wel mit mekaander uutzitten. Da's ja veul gezelliger!'

'Ja,' mient ok iene van de haezen, 'laoten we d'r mit mekaander een gezellig feest van maeken.' Iederiene is et d'r over iens, de dieren uut de bos van Piepmoes gaon van 't jaor mit mekeer et ooldejaor uutzitten. Intied bin ze al een hiel aende mit et versieren van de kastboom. Piepmoes en de gelegouw bin drok in de weer om een hiele mooie twie, twie prachtige nullen en een nog mooiere zesse te maeken. Ze doen dat van glimmend zulver- en gooldpepier. Wat zal dat aanst mooi liken!

Now, en et liekt ok allegere prachtig as et kastfeest is. De boom zicht d'r schitterend uut en et jaortal 2006 blinkt d'r over deur alle lochies die om et eupen plak hangen. Et kastfeest is hatstikke gezellig en de dieren hebben et vanzels vaeke over ooldejaorsaovend, daar hebben ze meraokel veul zin in. Et duurt ommes ok nog mar een peer daegen.

As et ooldejaorsdag is bakken et roodbossien, de gelegouw, een haeze, een knien en een ree heerlike euliebollen en appelflappen. Diedel en Daweltien, de beide honnen, maeken een peer ketels vol lekkere sukelaomelk die ze aovens zo opwaarmen kunnen. De molle en de protter gaon naor de winkel om steerties te kopen. Die gaon ze aovens om twaelf ure anstikken. Echt vuurwark kopen ze vanzels niet, dat is vusen te geveerlik, zéker in de bos. Een meerste dieren bin d'r trouwens ok hatstikke bange veur. Piepmoes en de doeve zullen veur gezellige spullegies zorgen. Spullegies zoas Mens-erger-je-niet, een memospul, een peer kwartetspullegies en een sjoelbak. As ze naor huus lopen om die spullegies op te haelen, hebben ze et drok over et kommende ooldejaorsfeest. Zó drok dat ze hielemaole niet in de gaten hebben dat d'r nóg een peer beesten in de buurt binnen. Et bin vanzels Klaos de kaeter en Miep. Die scharrelen toevallig ok krek in de bos omme en ze duken hadde aachter een polle as ze Piepmoes en de gelegouw ontdekken.

'Jammer da'k de boek krek hielendal rond heb,' zemelt Klaos tegen Miep, 'eers pakte ik die moes now vot-en-daolik en at him op.'

'En aandere ikke wel,' klaegt Miep al krek lieke hadde, 'now kún we him griepen, en now hebben we hielendal gien honger. En ik heb ok zo allemachtig vule katebrokkies aachter de koezen, da'k de iene pote haost niet meer veur de ere kriegen kan. Wat toch zunde.'

'Hool je es even stille,' fluustert Klaos inienend, 'moej' es heuren waar ze et over hebben.'

En dan vernemen de katten wat de dieren ooldejaorsaovend van plan binnen.

'Een makkie, Klaos,' mauwkt Miep, 'we hebben et dan mar veur et kiezen. Waor begin ie mit, mit de protter of mit et roodbossien?'

'Wat daenk ie now, kattedekop daj' binnen,' grauwt Klaos, 'ik eet vanzels eerst Piepmoes op. Ik vien moezen now ienkeer et alderlekkerste. Of daenk ie dat ik jow niet deur heb? Ie willen vanzels die lekkere vette moes zéls opeten. Mis poes, die is veur mi'j.'

Daor kriegen de katten verempeld nog ruzie ok, ze rollen mierkende en krijsende over mekeer henne. Ze maeken mekeer veur van alles uut, niet mooi meer. Ze raozen zó hadde, dat Piepmoes en de gelegouw van schrik staon blieven.

'De katten,' piept Piepmoes bange, 'waor moe'n we zo hadde henne. Douk pakken ze oons.'

'Et vaalt mit, donkt mi'j,' sjilpt de gelegouw. 'Ze maeken zoe'n ruzie dat ze niet in de gaten hebben, dat wi'j ze heuren. Kom mar gauw mit, we bin zo bi'j mien must.'

Et gaot allegere goed, mar as ze in et must van de gelegouw binnen, bedaenken ze dat ze wel wat verzinnen moeten om ooldejaorsaovend de katten tegen te hollen. Nao een schoffien gaot de gelegouw rechtop zitten en zegt tegen Piepmoes dat hi'j wel wat wet. As hi'j Piepmoes zien plan vertelt, schuddeboek die d'r over van et lachen. Ze gaon gauw - mar vanzels now wél veurzichtig - weeromme naor de ere dieren en vertellen heur over wat d'r gebeurd is én over et plan van de gelegouw. Iederiene het d'r nocht an en de honnen zeggen dat ze et plan wel evenpies uitvoeren zullen...

Op de laeste aovend van et ooldejaor is et mar wát gezellig in de bos van Piepmoes. Alle dieren bin op et eupen plak en doen spullegies mit mekeer. De euliebollen en de appelflappen gaon d'r best in en de sukelaomelk niet minder. As et haost twaelf ure is, wodt iederiene toch wel een betien stille. Nog evenpies en dan is et ooldejaor veurbi'j. De doeve pakt alvast et deusien lucifers om de steernies an te stikken. Mar dan opiens...

Percies om twaelf ure brekt d'r een hels geraos en gekrijs los. Et is niet iens zo veer uut de buurt. Tsjongejonge, wat zol daor now toch gebeuren... Een nuver begin van et ni'je jaor...

'Raek,' blaffen de beide honnen. 'Ze zitten d'r in. Kom mit, jonges, d'r is gien geveer. Wees niet bange, vertrouw oons mar, we hebben alles prima veur mekeer!'

En daor gaot et henne, in een lange riegel. Diedel en Daweltien veurop en de rest d'r achteran. Ze lopen in de richting van de boerderi'je. Et gejangk en gejammer wodt de hieltied luder. En dan blieven de honnen staon en gaon op de kni'jen liggen.

'Zegend ni'jjaor,' roepen ze een diep gat in. 'Zegend ni'jjaor, Klaos en Miep, en dawwe jim mar niet al te vaeke zien zullen van 't jaor. Misselike poedzakken dat jim binnen! Oonze ooldejaorsaovend bedarven, hen. Dat is dus faliekant mislokt. En as et an oons lag, leuten we jim et hiele ni'je in disse valkoele zitten. Mar ja, d'r bin d'r ok nog die medelieden mit jim hebben. Dat as jim now beloven dat jim in et ni'je jaor nóóit weer perberen zullen om Piepmoes te pakken, dan haelen wi'j jim morgen weer uut de koele.'

Now, de katten die op de kop in een valkoele valen binnen die de beide honnen greven hebben, weten niet hoe hadde as ze dat beloven moeten.

'Echt waor, lieve Piepmoes, lief klein moesien, wi'j zullen nóóit weer perberen jow te pakken. Wat hebben wi'j d'r toch een spiet van. Laot oons d'r asjebliedt uut, we doen et, eerlik waor, nóóit weer!'

Mar hoe lief de katten ok vraogen om vot-en-daolik uut de koele te meugen, dat feest gaot niet deur. Elk dier weenskt Klaos en Miep een goed ni'jjaor toe, mar gieniene haelt ze uut et gat. Ze kriegen elk nog al een euliebolle en een appelflap, mar pas de ere morgen haelen Diedel en Daweltien heur uut de koele. Al krimmenerende straampelen de beide katten op huus an en zeggen dat ze nooit weer naor die rotbos toegaon, dan mar elke dag een koemegien melk en kattedbrokkies. Mar as ze dat warlikel miencn, moe'n we volgend jaor vanzels allegere mar ofwaachten...!

# HELP PIEPMOES!!!


Piepmoes is drok an et schaetserieden. Hi'j vint dat prachtig, mar het staorigan zin an een beker waarme sukelaomelk. Waor moet hi'j langes om daore te kommen???



\*\*\*\*\*



## ZUUK DE 8 VERSCHILLEN



**IN EEN HIEL KLEIN KRIBBEGIEN**  
 (Op de wieze van: Op een grote paddestoel)

In een hiel klein kribbegien,  
 et was van stro en hooft.  
 Lag een hiel klein kientien,  
 mit ogies as van goold.  
 Jozef en Maria die weren d'r bliede mit,  
 et kleine kientien lachte,  
 iederiene was op 't schik.




**KLING, KLOKKIEN, KLINGELINGELING**

Kling, klokkien klingelingeling,  
 kling, klokkien kling.  
 't Kastfeest dat is kommen,  
 lochies in de bomen,  
 en in alle lanen,  
 gaon wi'j keersies branen.  
 Kling, klokkien klingelingeling,  
 kling, klokkien kling.



**TWINKEL, TWINKEL, KLEINE STEERN**  
 (Op de wieze van: Altijd is Kortjakje ziek)

Twinkel, twinkel, kleine steern  
 ik zie jow al van hiel, hiel veer.  
 An jow straolen in de locht,  
 hebben alle meensken nocht.  
 Twinkel, twinkel, mooie steern,  
 ik zie jow al van hiel, hiel veer.



**OE DENNEBOOM**

Oe denneboom, oe denneboom,  
 wat bin je takken wonder mooi.  
 Ik zag je lestend in de bos,  
 nog zonder keersies, op et mos.  
 Oe denneboom, oe denneboom,  
 wat bin je takken wonder mooi.

